

**Unnerluussissutit eqqartuussisussaataasullu
eqqartuussissutigittinniagaasa il.il. assilillugit
sanaqqinneqarnerinnik inuppassuarnut tusagassiuutit
allagaatinik takunnissinnaatitaanerit toqqorsisarnissaallu
pillugit Kalaallit Nunaannut nalunaarut**

Inatsimmik allanngorneri ilanngullugit nalunaarutiginninneq nr. 1186, 18. september 2023-imeersoq, [...] -kkullu allanngortinneqartoq malillugu Kalaallit Nunaanni eqqartuussisarnermik inatsimmi § 101 e, imm. 2-mi oqaaseqatigiit sisamaat, imm. 7, aamma imm. 8-mi oqaaseqatigiit aappaat malillugit aalajangerneqarpoq:

§ 1. Eqqartuussisarnermik inatsimmi § 101 e, imm. 2 malillugu unnerluussissutit imaluunniit eqqartuussisussaataasut eqqartuussissutigittinniagaasa assilillugit sanaqqinneqarnerinik eqqartuussisussaataasut tunniussinerat, siusinnerpaamik piffissani tulluuttuni taaneqartuni pisinnaavoq:

1) Unnerluunneqartumut imaluunniit pissutissalimmik pasisamut takussutissiap nalunaarutigineqarnerata kingorna sapaatip akunnerata ataatsip qaangiunnerani.

2) Unnerluunneqartumut imaluunniit pissutissalimmik pasisamut takussutissiap allakkatigut digitaliusutigut nassiunneqarnerata kingorna sapaatip akunnerata ataatsip qaangiunnerani.

3) Takussutissiaq utertinneqarluni tiguneqarsimanngippat, unnerluunneqartumut imaluunniit pissutissalimmik pasisamut takussutissiap nalinginnaasumik allakkatigut nassiunneqarnerata kingorna ullut 14-it qaangiunneranni.

4) Ullormi pingaarnertut isumaqatigiinniarfiusumi imaluunniit eqqartuussinermi.

§ 2. Unnerluussissutit, eqqartuussisussaataasut eqqartuussissutigittinniagaat, eqqartuussisut allattaaviini allatat aamma eqqartuussisarnermik inatsimmi § 310 c, imm. 3-mi taaneqartutut assiliilluni allakkat, eqqartuussisarnermik inatsimmi § 101 e, imm. 2 aamma 5 malillugit assilillugit sanaqqinneqarneri tunniunneqartut, tigunerisa kingorna inimi, sikaavimmi imaluunniit assigisaanni, taamaallaat inuppassuarnut tusagassiuutit tusagassiortuisa aamma tusagassiuutini aaqqissuinermut tunngasunik sulisut allat tikissinnaasaanni, parnaaqqasumi toqqorneqassapput.

Imm. 2. Pinerluttulerinermi suliani aalajangiinerit assilillugit sanaqqinneqarneri, eqqartuussisarnermik inatsimmi § 101 b malillugu, eqqartuussisarnermik inatsimmi § 101 e, imm. 1-imi inunntut taaneqartunut tunniunneqartut, tigusinerup kingorna, aamma suliap inaarutaasumik naammassineqarnissaanut, taamaallaat inuppassuarnut tusagassiuutit tusagassiortuisa aamma tusagassiuutini aaqqissuinermut tunngasunik sulisut allat tikissinnaasaanni, parnaaqqasumi toqqorneqassapput.

§ 3. Inatsisiliorneq alla malillugu akuliunnermik annertunerusumik pillaatissiineq nammineq pisuussutigineqanngippat, inuk § 2-mik unioqqutitsisoq akiliisitsissummik akiliisussanngorlugu eqqartuunneqassaaq.

Imm. 2. Ingerlatseqatigiiffiit il.il. (inatsisitigut pisinnaatitaasut pisussaataitaasullu) pinerluttulerineq pillugu inatsiseqartitsineq malillugu Kalaallit Nunaani pinerluttulerinermi inatsimmi kapitalit tallimaanni malittarisassat malillugit akisussaafileqarsinnaapput.

§ 4. Nalunaarut ulloq 1. januar 2025 atuutilissaaq.

Imm. 2. Tamatuma peqatigisaanik Kalaallit Nunaanni unnerluussissutit il.il. nuutinnerinik tusagassiorfiit paasitinneqarsinnaatitaanerat toqqortaqaarsinnaatitaanerallu pillugit nalunaarut nr. 1354, 15. december 2009-meersoq atorunnaarsinneqassaaq.

Imm. 3. Eqqartuussisarnermik inatsimmi § 102-mi malittarisassaq maannamut atuuttoq malillugu takussutissianut takussutissiinernullu,

Ulloq 1. januar 2025 sioqqullugu tunniunneqartunut, § 3-mi
aalajangersagaq aamma atuuppoq.